

مکرمات

ادبی و سیاسی رسالهٔ اسبوعیه در

۳۱ نجی سه

۱۲ صفر ۱۳۳۰

پنجشنبه

جزو عدد : ۱۳۲

قلندر - وَ - قلندرلك

اصطلاحزده رندلا ابالی . مجرد علایق . آزاده قیود و مراسم اولانلره
اطلاق اولنورکه - یانسه جهان ایچنده حصیری بولغیه - قولنك ماصدق مشخصی
اولان درویش ینوادر .

قلندر بر آدمدر + تعبیری هیچ بر شیشه مالک دکلدر . مفهومینی افاده ایدر .

قلندر مشربان رند عالم

شوندازی علایق شادوخرتم

§

قلندرلك بر طریق مخصوصدرکه اساسی ظاهرآ تخریب عادات و عبادات ایله
جلب طعن و دشنام و باطناً اعمال حسنهیه حصر نفس و اهتمام ایتمکدن و بوصورتله
طالب جمال حق اولمقدن عبارتدر . بوجهتله دنیا و مافیها نظرلرنده هیچ اولدیفنی کبی
نشئه اخرادهکی حالت صفا و زلفی دخی عندلرنده ملتزم اولمدیفندن، کونین و اهل -
کونین جانبیه میل دروندن کلیاً آزاده بولمقددر . ذره قدر حب دنیا و مافیها
ویا آرزوی منزلت عقبایگیر ضمیرلری اوله جق اولسه اصحاب غرور و طلبدن معدود
و سلسله قلندراندن منفک و مطرود اولورلر .

حاصلی عابد و زاهددرلر + لکن زهد و طاعتده قصر اعمال اظهار ایدرلر .
و تجرید و تفرید ایله تخریب رسوم و عادات ایلرلر .

بونلر ایکی صنفدر . بری هدف ملامت انام اولمقی مقصد ایدغش طاقددرکه
اغیاردن کتم اعمال حسنه ایتدکلری حالده صورت سیئنه صادر اولان فعللرینی
ستر و اخفایه لزوم کورمزلر . بونلره بین الناس (ملامی) نامی ویرلمکدهدر .
لوم لائمی جالب افعالی التزام ایتملری وجه تسمیهدر .

دیگری صوفی صنفیدر، که نه خلق ایله مشغول، نه ده آنلرک قبول وردن
منون ومنفعل اولورلر. الحاصل غایه سلوکری تفرید و تجریده احراز مرتبه
کمال ایله واصل الی الله اولمقددر.

§

قلندرلکک واضعی سادات نقشبندی سید جلال بخاریدر. بومسلک اربابنک
یتوتسکاهلرینه [قلندرخانه] اطلاق ایدیلورکه بخاراده واضع مذهب قلندری،
سیدجلاله نسبت اولنان قبو جوارنده برخانقاه عظیمدر.

بوطریقه سلوک ایدنلر طوبوقلرینه قدر اوزون، فقط قولسز بر خرقة
اکتساشنه مجبوردر، که بوده کفنه علامت وفوت قبل الفوتدن کنایتدر.
وبلرینه دوه یوگندن بوکولش [چلتار] نامنده قرق ایپلکدن منسوج
برکمر باغلارلر، که رجال اربعینه اشارتدر.

کافهسی مجرد و منفرد وناس ایله، ولوپدر و برادری اولسون مخالط
ومصاحبتدن مجتنبدر.

اقرار و یردکاری گون کلاهلرینک تپهسنی بر ایپله باغلارلر، که بوده ینه کفنه
علامتدر. وبو باغه [شیدایی] دیرلر، که عقل و شعور ایله علاقلری اولمدیغنی
اعلام ایدر.

اکمال چلهیه قدر بوقیافته گزرلر. چلهلرینک حدی معین دگدر، استعداد
شخصیه گوره تخلف ایدر.

هرکون ایچلرندن برکروه قلندرخانهدن جیقهرق، عجب، ریا، کبر، تفاخر،
عزت نفس کبی، حالات نفسانییهی تحقیر و نفسلرینی تدبیل مقصدیه تسأل ایدرلر.
بوسؤال، هفتهده برکرمه نوبتله هر شخصه اصابت ایدر. وهرکون طوبلادقلری
ارزاق ونقودک مجموعنی اوکونکی نفقهلرینه صرف وخرج ایله محصول سسوالدن
فردایه حبه واحده براقزلر.

غنائی قلب قدر نعمت اولماز اهل دله
بو تکیه نك فقراسی سقاط یلزلر

قولى ، معیشت قلندرانى معرفدر .

قلندر خانه ده دخی یکدیگریله مصاحبتده بولمازلر . بلکه اشراقیون کی بلاصوت

وبلا حرف مقاضیه مرام ایدر لر .

بعضاً براوطه ده برقاچ قلندر بولور . هر بری برکوشه یه چکیله رك کندی حال

وبالیه مشغول اولور . بر فرد . بر فرد نه اولدك ، نه ایشلدورسك ؟ دیمز . بونکله

برابر هر فرد یکدیگری نك واقف آمالیدر .

ابو الضیا

